



Kementerian Pembangunan Wanita,
Keluarga dan Masyarakat

KEMENTERIAN PEMBANGUNAN WANITA, KELUARGA DAN MASYARAKAT

SIARAN MEDIA

MALAYSIA MENANDATANGANI INSTRUMEN KESERTAAN KE ATAS PROTOKOL PILIHAN KEPADA KONVENSYEN MENGENAI HAK KANAK-KANAK

KUALA LUMPUR, 2 APRIL 2012 – Kerajaan Malaysia sekali lagi mengukuhkan usaha dan iltizam negara dalam memberi perlindungan kepada kanak-kanak daripada eksploitasi seksual dan pemerdagangan kanak-kanak serta memberi perlindungan kepada kanak-kanak daripada melibatkan diri dalam konflik bersenjata.

Perkara ini telah dimanifestasi menerusi 2 instrumen kesertaan negara untuk 2 protokol pilihan di bawah Konvensyen Mengenai Hak Kanak-kanak yang ditandatangani oleh Y.B. Senator Dato' Seri Shahrizat Abdul Jalil, Menteri Pembangunan Wanita, Keluarga dan Masyarakat. Kedua-dua Protokol Pilihan tersebut ialah *Optional Protocol on the Sale of Children, Child Prostitution and Child Pornography* dan *Optional Protocol on the Involvement of Children in Armed Conflict*.

Menurut Y.B. Dato' Seri Shahrizat, “kesertaan (*accession*) kepada kedua-dua Protokol Pilihan tersebut menunjukkan komitmen berterusan Malaysia dalam menjamin kesejahteraan dan kebajikan kanak-kanak. Langkah Kerajaan untuk menyertai Protokol Pilihan ini turut meningkatkan imej negara yang telah mempunyai rekod yang membanggakan dalam mempertahankan hak dan kepentingan terbaik kanak-kanak di negara ini.”

“Kedua-dua Protokol Pilihan ini juga dapat dijadikan panduan oleh Kerajaan dalam mempertingkatkan usaha memberi perlindungan kepada kanak-kanak di negara ini daripada menjadi mangsa pemerdagangan, eksploitasi seksual, pelacuran dan penglibatan dalam konflik bersenjata,” kata beliau.

Secara amnya, ***Optional Protocol on the Sale of Children, Child Prostitution and Child Pornography*** bertujuan membanteras pemerdagangan, pelacuran dan pornografi kanak-kanak melalui pendekatan menyeluruh dengan memberi tumpuan kepada faktor-faktor yang menyumbang seperti kemiskinan, keruntuhan institusi keluarga, kurang pendidikan, diskriminasi gender dan sebagainya. Hingga kini, sebanyak 146 buah negara telah meratifikasi Protokol Pilihan ini.

Manakala ***Optional Protocol on the Involvement of Children in Armed Conflict*** pula ialah protokol pilihan untuk meningkatkan perlindungan kepada kanak-kanak daripada menjadi mangsa konflik bersenjata. Protokol ini juga akan memperkukuhkan kerjasama antarabangsa berhubung pemulihan dalam aspek fizikal dan psikososial serta integrasi sosial di kalangan mangsa kanak-kanak yang terlibat dalam konflik bersenjata. Sehingga kini sebanyak 146 buah negara telah meratifikasi Protokol Pilihan

ini.

###

Disediakan oleh : Kementerian Pembangunan Wanita, Keluarga dan Masyarakat,
Aras 38, No 55,
Persiaran Perdana, 62100 Putrajaya.

No. Telefon : 03 – 8323 1000

Tarikh dikeluarkan : 2 April 2012